


Hasta machine di "Mole" a worde usa...

Autoridad no ta entrega y buskeda a continua pa Natalee



Un boto yudando den e buskeda riba laman tambe.

ORANJESTAD (AAN): Te cu Diabierna anochi e Team Special di Polis, cu nan 16 oficial di Recherche, cu sosten di Kustwacht, Flexi Team, a sigui cu e buskeda incansable pa Natalee Holloway, e estudiante di 18 aña procedente di Alabama kende a perde na comienzo di e siman aki.

E grupo di Flexi Team, DIARIO a haya sa cu nan tabata yuda averigua e tip nan tambe cu tabata drenta. Na diferente lugar direccion a worde controla. Nan a drenta den Savaneta, tambe a bay Village, y demas costa a worde revisa enbusca di e mucha muher Mericano.

Tur esfuerzo cu a combinacion di e team nan a haci no a duna resultado ainda. Nan ta carga speranza cu e Tip di Oro por drenta un rato of otro.

Den oranan laat di mainta, Beth Holloway Twitty a tene un conferencia di prensa na Holiday Inn, unda un biaha mas e ta roga pa Natalee regresa sano y salvo. El a gradici tur esnan cu ta yudando den e buskeda, y a expresa palabra di danki na Prome Ministro kende a yuda pa asina Mariniernan Hulandes por participa den e buskeda.

E ta desea si, pa Merca manda mas yudanza den e buskeda di Natalee. Aunke ya caba autoridad na Aruba a bisa cu no mester di mas yudanza.



Mientras tanto di parti amigo y conocirnan di famia di Natalee a sigui cu partimento flyer tur caminda cu nan a presenta tanto den comercio y personanan individual a duna nan e sosten necesario. Tambe e miembronan di FBI cu ta na Aruba relaciona cu e desaparicion di Natalee ta compila informe for di exterior cu nan coleganan.

Locual ta encera e buskeda cual e team combina a eherce ayera, a worde usa un aparato special cu por detecta curpa di hende. Den pasado esaki a worde usa den Mangelnan pa averigua si lo por tin persona scondi, el a funciona ya cu el a duna resultado positivo.

Tambe por menciona cu desde cu informe a plama na Merca di e caso di Natalee, prensa di Merca di tur skina

tabata yama medionan local polis pa haya mas tanto posible informenan relaciona cu nan compatriota Natalee.

Por ultimo ainda no tin ningun motibo pa autoridad bay over pa detene esnan cu na prome instancia tabata den compania di Natalee. No tin evidencia clave segun DIARIO por a comprende. Pero ta tene debito cuenta autoridad sa kende nan ta, un funcionario halto den gobierno a duna di conoce na prensa Mericano, aunke el a keda anonimo.

Ministro di Husticia riba Diabierna anochi laat, a anuncia den conferencia di prensa cu e ta furioso cu autoridad a laga e 3 hobennan den libertad. Uno ta Hulandes, y dos otro ta Surinameño. Pero el a keda sorprendi cu e.o. Comisario van der Straten ta papia cu prensa Mericano y ta referi

na "tres hoben local". Con nan por ta local, siendo cu nan ta stranhero. Pesey a dicidi pa di awor en adelante, solamente Comisario Gerold Dompig y Sub Inspector Comenencia por duna declaracion.

Ministro a papia personalmente cu mama di Natalee, y a pidi disculpa cu Aruba ainda no a logra solucion a caso aki.

Tambe Ministro a haci suplica pa autoridad divulga potret di e tres hobennan aki, pa asina pueblo mira nan y kizas yuda refresca memoria di pueblo cu por a mira nan Dialuna madruga.

Diabierna anochi laat, un avion di Forza Aereo Mericano a ateriza na Aruba, treciendo mas hende y equipo di FBI pa yuda den e investigacion.

Diadomingo tin dos Misa special pa Natalee

ORANJESTAD (AAN): Dos misa special ta ser prepara pa Diadomingo awor, pa haci oracion y pidi Todopoderoso pa yuda e hoben Mericano, Natalee Holloway, regresa back sano y salvo cerca su famianan.

Pa 11:00 a.m. lo tin Misa na Ingles na Iglesia Santa Anna na Noord.

Pa 8:30 a.m. di e mesun mainta, tin Misa na Papiamentu na Iglesia Santa Theresita na San Nicolas. Tur hende ta bon bini pa hunto reza pa famia Holloway.